

西陲總統事畧

卷一之十二

西陲總統事畧目錄

卷十一

土爾扈特源流

哈薩克源流

布魯特源流

霍罕路程記

西陲總統事畧卷十一

宮保將軍松筠湘浦纂定 男熙慶亮績校字

原任山東知縣汪廷楷仰亭原輯

原任戶部郎中祁韻士鶴臯編纂

原任城守尉宗室廣寧安齋繪圖

前任吏部員外郎程振甲也園校刊

土爾扈特源流

土爾扈特舊爲四衛拉特之一徙居俄羅斯境其俗重黃教置鄂拓克設宰桑悉同準噶爾乾隆三十六年其汗渥巴錫等率全部來歸受封爵先是康熙年

間有阿玉奇汗名最著慕

天朝威德曾通貢

聖祖仁皇帝遣侍讀圖麗琛等假道鄂羅斯往宣

諭而俄羅斯故爲紆繞其程凡行三年又數月始反命圖麗
琛有異域風土記紀其事阿玉奇之父曰棚楚克其
祖曰書庫爾岱青其曾祖曰和鄂爾勒克其高祖曰
卓立甘和鄂爾勒克其高祖之父曰貝果鄂爾勒克
以上世遠無可攷自貝果鄂爾勒克至和鄂爾勒克
皆單傳和鄂爾勒克有子六人一卽書庫爾岱青餘
三無子其二有子孫皆式微無足傳書庫爾岱青子

四人絕嗣者二其一卽棚楚克是爲汗渥巴錫之曾祖其一曰那木策楞是爲郡王巴木巴爾之曾祖阿玉奇有子八人其六皆無嗣其一曰袞札布是爲親王策伯克多爾濟之曾祖其先世之徙俄羅斯也蓋自阿玉奇之曾祖和鄂爾勒克始其時四衛拉特各自爲汗無所統屬和鄂爾勒克與準噶爾巴圖魯渾台吉不睦率子書庫爾岱青等北徙俄羅斯屯牧額濟勒河倚騰吉忠巨澤所居地曰瑪努托海時阿玉奇尙在襁褓以巴圖魯渾台吉乃其外祖被畱不遣後書庫爾岱青往西藏還至準噶爾始索阿玉奇以

歸其額濟勒之境北界俄羅斯南界哈薩克東界哈喇哈爾榜西界圖里雅斯科以鄰牧互市皮馬俄羅斯嘗與雪西洋及西費雅斯科戰土爾扈特以兵助之厥後稍就弱俄羅斯因稱爲已屬然本附之非降之也迨渥巴錫之父敦羅布時俄羅斯益征調師旅不息繼復徵子入質不堪其虐而俄羅斯又屬別教非黃教比故渥巴錫與合族台吉密謀挈全部歸順中國以息肩焉其遠族有舍稜者曾以計誘害我副都統唐喀祿懼誅逃往額濟勒至是亦隨渥巴錫來歸以乾隆三十五年冬自額濟勒啟行歷哈薩克繞

巴勒喀什淖爾戈壁于次年六月始至伊犁之沙拉伯勒界凡八閱月歷萬餘里本有戶三萬三千有奇口十六萬九千有奇及抵伊犁僅存其半且皆饑餒狀甚憊

高宗純皇帝鑒其歸順之誠撫而納之且爲贍其生所以優恤之者無微弗至事具

御製記中甚詳封汗一曰汗巴錫親王一曰策伯克多爾濟郡王二曰巴木巴爾曰舍稜貝勒二曰默們圖曰恭格貝子三曰沙喇扣肯曰旺丹色布騰曰雅蘭丕勒輔國公一曰拜濟呼扎薩克台吉四曰達木拜曰德

爾德什曰札爾桑曰諾海餘皆以次遞授爵秩有差
渥巴錫同旗設十扎薩克爲烏訥恩蘇珠克圖盟稱
舊土爾扈特舍稜族設兩扎薩克爲青色特啟勒圖
盟稱新土爾扈特恭格雅蘭丕勒諾海本和碩特族
其先亦徒俄羅斯今偕渥巴錫來歸其同族設四扎
薩克爲巴圖色特啟勒圖盟游牧之地共分五處其
分駐喀喇沙爾之著勒土斯地方者爲土爾扈特汗
渥巴錫和碩特貝勒恭格等部衆游牧東南界喀喇
沙爾城西北界伊犁之納喇特達巴罕東北界烏魯
木齊南山西南界阿克蘇庫車其分駐伊犁之東精

河地方者爲土爾扈特貝勒默們圖等部衆游牧東
界精河城南界伊犁圍場哈什山陰西北與伊犁屬
之察哈爾游牧連界其分駐庫爾喀喇烏蘇之濟爾
哈朗地方者爲土爾扈特郡王巴木巴爾等部衆游
牧東與瑪納斯卽綏來縣西界接壤北與塔爾巴哈
台之沙喇布拉克地方連界南界奎屯溝西界托多
克軍台其分駐塔爾巴哈台之和博克薩里地方者
爲土爾扈特親王策伯克多爾濟等部衆游牧西南
與彼處所屬之察哈爾厄魯特連界西北與哈薩克
連界東南皆戈壁荒山東北界噶札勒巴什淖爾與

科布多之烏梁海接壤此四游牧卽所謂舊土爾扈特及和碩特皆屬伊犁將軍統轄者也其新土爾扈特游牧則分駐科布多所屬阿勒台地方隸科布多叅贊大臣專轄此外有杜爾伯特部汗王貝勒貝子公台吉凡十四札薩克游牧烏蘭固木又輝特兩札薩克台吉均隸科布多以其皆爲四衛拉特之遺故併叙之

哈薩克源流

向傳哈薩克爲古大宛國非也漢書言大宛有城郭而今哈薩克則隨畜徙牧與大宛異俗且距伊犁西北二面伊犁爲烏孫故地証以漢書所言烏孫西北與康居接之文則哈薩克當卽古康居國詳見

高宗純皇帝御製集中其部有三曰左部曰右部曰西部其實東中西耳距京師萬餘里向爲準噶爾所阻未通聲教乾隆二十二年大軍追剿叛賊阿睦爾撒納直入其境哈薩克謀擒之以獻其左部汗阿布賚稱臣內屬受封爵尋遣使札噶喇等入貢是年秋叅贊大

臣富德率兵追捕準夷餘黨哈薩克錫拉至右部境
會其與塔什罕部構釁互攻方背水決勝因遣侍衛
蒙古爾岱單騎入其陣宣諭

威德哈薩克稽顙聽命而塔什罕回目亦悔悟息爭右部汗
阿布勒比斯卽日遣使入貢其書畧曰右部與左部
阿布賚同爲雄長今得均隸臣僕請陪左部自効語
極眞摯使至均

賜宴優賚遣歸二十四年阿布賚遣其從子俄羅斯蘇爾統
入

凱蘇爾統者其汗近族之貴稱猶準噶爾所謂台吉也二十

五年復遣從子都勒特赫勒蘇爾統入

覲

上慮其道遠不能急馳傳

諭緩程而行於十月初旬至熱河而蘇爾統以九月三日自

烏里雅蘇台啟行月之十八已抵波羅河屯奏言途中驛騎餽糧極蒙優恤不致跋涉之勞急欲瞻覲

天顏以抒誠悃

上優獎之其同來之陪臣鄂莫爾色楞伯特爾皆乞畱充

宿衛

命爲乾清門侍衛二十八年西哈薩克啟齊玉蘇部之努喇

麗汗巴圖爾汗烏爾根齊部之哈雅布汗同遣使奉表貢

賜賚如左右二部例三十四年阿布賚遣子幹里蘇爾統等
阿布勒比斯遣子卓勒齊等先後入

覲

宴賚有加四十七年阿布賚卒

上念哈薩克誠心歸順歷久益虔卽封阿布賚之子幹里爲
汗尋遣其弟沙海蘇爾統來謝

恩阿布勒比斯亦遣子噶岱入

覲竝

賜宴賚嗣西部努喇麗汗遣子阿布賴蘇爾統來貢卒于途
陪臣哈喇托霍代至亦預

宴賚蓋自哈薩克向化輸誠以來備極恭順朝貢至今不絕
云所部本回種而游牧散處無屋宇定居其屬雖設
鄂托克以頭目領之然攘竊成風漫無約束卽其汗
亦不能禁止風俗大抵與回人相似惟不知禮拜諷
經之事宴會以牛羊馬駝爲饌馬湏爲酒以衣多爲
華美其附近伊犁塔爾巴哈台一帶游牧者往往潛
入卡倫竊馬必嚴緝懲治之每遇冬季邊外雪大許
其附近卡倫牧放牲畜暫爲度冬每馬百匹例收租

馬一匹每年夏秋其台吉頭目等各率所屬分運牛羊馬匹並由安集延所販氈片牛皮等物至伊犁貿易以綢緞布疋償之塔爾巴哈台亦然其初來之時各卡倫官兵查明稟報始准放入及貿易則另派官兵照料台吉頭日照例宴延此撫馭之大畧也至其部鄂托克名目今備載於左

哈薩克汗瓦哩蘇爾坦所轄

阿塔海阿爾幹鄂托克

原係哈薩克汗阿布賚所居地方現今伊子瓦里蘇爾坦居住

瑚蘭索阿爾幹鄂托克

額克葉克阿爾幹鄂托克